

AWIG - AWIG DESA ADAT BERABAN



DESA BERABAN - KECAMATAN SELEMADEG
KABUPATEN TABANAN
WARSA 2000

BANTANG AWIG – AWIG

		Kaca
MURDDHA WAKYA		1
PRATHAMAS SARGAH	ARAN LAN WEWIDANGAN	1
DWITTYAS SARGAH	PATTIS LAN PAMIKUKUH.....	2
TRITTYAS SARGAH	SUKERTAN TATA PEKRAMAN	2
	Palet 1 Indik Krama	2
	Palet 2 Indik Prajuru lan Dulun Desa	4
	Palet 3 Indik Kulkul	6
	Palet 4 Indik Paruman	6
	Palet 5 Indik Druwen Desa	7
	Palet 6 Sukertan Pamitegep	8
	Kaping 1 Karang, Tegal lan Carik	8
	Kaping 2 Pepayonan	9
	Kaping 3 Wewangunan	9
	Kaping 4 Wewalungan	10
	Kaping 5 Bhaya	10
	Kaping 6 Panyanggran Banjar	11
CATURTIYAS SARGAH	SUKERTAN TATA AGAMA	11
	Palet 1 Indik Dewa Yajnya	11
	Palet 2 Indik Resi Yajnya	13
	Palet 3 Indik Pitra Yajnya	14
	Palet 4 Indik Manusa Yajnya	16
	Palet 5 Indik Bhuta Yajnya	17
PANCAMAS SARGAH	SUKERTAN TATA PAWONGAN	18
	Palet 1 Indik Pawiwahan	18
	Palet 2 Indik Nyapihan	18
	Palet 3 Indik Sentana	18
	Palet 4 Indik Warisan	19
SAD SARGAH	WICARA LAN PAMIDANDA	19
	Palet 1 Indik Wicara	19
	Palet 2 Indik Pamidanda	19
SAPTAMAS SARGAH	NGUWAH – UWUHN AWIG – AWIG	20
ASTAMAS SARGAH	SAMAPTA	21
LEPIHAN	I	
	II	
	III	

MURDHA WAKYA

OM AWIGHNAM ASTU NAMA SIDHAM

Sembah bakti miwah pangastawan titiang majeng ring paduka Bhatara-Bhatari sesuwunan titiang sami riantukan wantah malarapan panghyaning kalih paswecan Ida Sang Hyang Widi Wasa asung kerta waranugraha nyresti jagat jangkep rawuhing sadagingnya sami mawinan wenten kahuripan sekala lan niskala ring buwana agung miwah ring buwana alit. Manut dresta, desane kamanggehang dados pasayuban kerama desa rawuhing kulawarga pawongannya sami, mawastu raris desane kamanggehang pinaka pawakan buwana agung, pawongannya kemanggehang pinaka pawakan buwana alit.

Sotaning pawakan buwana agung, desane taler kamanggehang pinaka pawakan bhawa mahurip sane kacirenin antuk wentene pakilit Tri Hita Karana sane nenten dados pasahang, luire :

- ha Parhyangan sahanan parhyangan panyiwian desa, genah ngarcanabhawan Ida Sang Hyang Parama Wisesa, pinaka jiwana desa.
- na Pawongan, gebogan kerama saha warga desa maka sami pinaka bayu pramanan desane, mawinan desane prasida maolah prawerti.
- ca Palemahan, sahananing tanah kekuwuban wewidangan desa, pinaka stulan desane.

Adung patemoning buwana agung ring buwana alit maka larapan ngupadi santa jagadhita punika sinanggeh murdhaning prayojana pangriptaning awig-awig, rikala paseban mami kerama desa Desa Adat Beraban pinaka sepat siku-siku pamatut miwah pamutus wastu kasidan prayojanan mami kabeh, prasama angidep muwah amanggehakan linggih awig-awig kadi ring sor puniki.

PRATHAMAS SARGAH

ARAN LAN WEWIDANGAN DESA

Pawos 1

1. Desa Adat puniki mawasta Desa Adat Beraban.
2. Wawengkonnya inggih punika sawewidangan Desa Adat Beraban sane mewasta nyatur desa.
 - ha. Sisi Kaler antuk Desa Adat Tangguntiti.
 - na. Sisi Kangin antuk Luah Tukad Yeh Ho.
 - ca. Sisi Kelod antuk Segara.
 - ra. Sisi Kauh antuk Desa Adat Tegalmengkeb.
3. Jebar wewidangan sane kawengku antuk wates-wates inucap wenten 250.000 Ha.
4. Sane kamanggehang ngranjing dados kekuwub wewidangan Desa Adat puniki, manut dresta, luwire :
 - ha. Pupulan karang paumahan sane sinanggeh palemahan desa Pakraman.
 - na. Setra, carik miwah tegal sane wenten ring kekuwub wewidangan desa adat puniki sajabaning palemahan desa adat pakraman, manggeh ngranjing dados telajakan Desa Adat Beraban.
5. Desa Adat puniki kacpah dados 2 Banjar, luwire :
 - ha. Banjar Gerombong
 - na. Banjar Beraban

6. Awig-awig, pararem miwah sahanan Pasuara Desa, manggeh kajejerang ring jebar kekuwub wewidangan desa adat puniki sami.

DWITIYAS SARGAH

PATITIS LAN PAMIKUKUH

Pawos 2.

Desa Adat Beraban ngamanggehan pamikukuh, minakadi.

1. Pancasila.
2. Undang – Undang Dasar 1945, pemekas pasal 18.
3. Tri Hita Karana, manut sadacara Agama Hindu.

Pawos 3.

Patitis Desa Adat Beraban luire.

1. Mikukuhin miwah ngerajegang Sang Hyang Agama mejalaran antuk astiti bhakti.
2. Nginggilan tata prawertine maagama.
3. Ngerajegang kasukertan desa saha pawongannya sekala lan niskala.

TRITIYAS SARGAH

SUKERTAN TATA PEKRAMAN

Palet 1

Indik Krama.

Pawos 4.

1. Sehananing sang jenek mapaumahan ring wawengkon wewidangan Desa Adat Beraban sinanggeh warga desa.
2. Kerama Desa Beraban inucap tata linggihnyane wenten 2 (kalih) soroh, luire.
 ha. Kerama Desa sane meagama Hindu tur sane nyungkemin Kahyangan Desa Adat Beraban, sinanggeh kerama Desa Adat Beraban.
 na. Sajabe punike sinanggeh tamiu, sane kasulurang manut pararem.

Pawos 5

Dasar Pakraman.

1. Sehanan warga desa sane sampun marabian, patut ngawit makrame desa adat.
2. Satunggil kerama manut karendahannya, patut keni sinalih tunggil ayah-ayah :
 ha. Ayahan ngarep.
 na. Ayahan bahu.
3. Sasengker ngawit tedun ngayah.
 ha. Marep ring kerama desa sane mawit saking pawiwahan, masengker ring tahun baru kalender saking puput makala-kalan.
 na. Marep ring kerama desa sane muaka mawit saking ngarangin, kasulurang manut pararem.
4. Kerama Desa sane wenang nyade yan sampun kapastika, luire.
 ha. Sungkan tahunan.

- na. Yan sampun maduwe pangentos utawi penyelidihi.
ca. Risampun manyusa 70 warsa.

5. Sang saking sewosan desa yan sareng tedun mekrama desa ring Desa Adat Beraban patut keni batu-batu utawi pamoggog, sane agengnya kasulurang manut pararem.
6. Yan wenten kerama saking sewosan desa sareng ngeranjing mekerama desa ring Desa Adat Beraban patut kedulurin antuk surat keterangan sane jangkep.

Pawos 6.

Wusan dados mekrama desa, luire.

1. Sangkaning :
ha. Seda.
na. Pinunas ngraga, menawi magingsir linggih saking wawengkon Desa Adat Beraban.
ca. Kanorayang, malantaran piwal ring awig-awig miwah pararem kerama desa utawi tan satinut ring pituduh prajuru sajeroning indik nyupat sikian, minakadi nenten prasida ngesehin prawerti.
ra. Tata - titine nitenin wusan dados kerama desa inucap ring ajeng, kasulurang manut pararem.
2. Sang wusan dados krama desa tan polih pahpahan druwen desa sawawaning pahpahan sane mawit saking usaha banjar, miwah tan polih pasayuban malih sajeroning ala ayu.

Pawos 7.

Sahanan kerama desa patut keni tetegenan utawi ayah-ayah, luire.

1. Ayahan ngarep, mapiteges paturunan miwah ayahan mamungkul saking kerama ngarep.
2. Ayahan balu, luire.
ha. Balu remban, sane pianaknyane kantun alit-alit, punika keni ayahan balu remban, sane kasulurang manut pararem.
na. Balu ngelintik, keni ayah-ayah balu manut balunnya, yan lanang keni ayahan lanang, yan istri keni ayahan istri.
3. Ritatkala ngardi wewangunan kabuatan sekadi ring sor :
ha. Paturunan samiwbaga manut pararem.
na. Dana punia, manut kelascaryan sang medana punia.
4. Kerama Desa kedadosang :
ha. Mapuankid utawi tan tedun ngayah / parum.
1. Rikala mapawangunan, ngrabian, nangun yajnya, nandur, kaluasan masengker dewasa.
2. Keni dedawuhan saking guru wisesa.
3. Kapialang luire sungkan, matepetin, kalayusekaran lan sakancan punika.
na. Dados ngawakilang ring jadma tiosan sane sampun menek daa / truna rikala ngayah utawi parum.
ca. Dados mogpog utawi numbas ayahan, prade
1. Dados pegawai negeri utawi pegawai perusahaan swasta.
2. Magenah ring desa sewosan melantaran ngrereh pekaryan.
ra. Dados nyelidii utawi nyuksukin kerama ngarep yan sampun mayusa 17 warsa.

Pawos 8.

Patutan Kerama Tamiu.

1. Kerama tamiu, patut medana punia ring desa / banjar, manut perarem.
2. Kerama tamiu, patut polih pasayuban marupa pitulung rikenjekan kaiben pancabaya.
3. Sahanan pari laksana mangda masadok ring prajuru.

Pawos 9

Paturunan miwah leluputan.

1. Peturunan utawi pepason kerama desa sajeroning ngulati kasukertan desa kapitegenang ring kerama.
2. Desa / banjar mapaweh leluputan ayah-ayah utawi pekenan-kenen sang inggilang - linggih, utawi sang kawelas asih.
3. Sor singgih miwah bacakan sang luput kaungguhan ring pararem.
4. Sejabaning prajuru desa sane pastika patut polih leluputan pemekasnya :
 - ha. Para sadaka mekadi pemangku kahyangan, penyiwaan lan penyade.
 - na. Sang sungkan tahunan.
 - ca. Wong cuntaka banget.
 - ra. Wong ubuh meme bape mayusa 17 warsa.

Palet 2.

Indik Prajuru lan Dulun Desa

Pawos 10

1. Desa Adat Beraban kaenter antuk Prajuru Desa Adat, kemanggala antuk Bendesa Adat.
2. Banjar kaenter antuk Prajuru Banjar, kamanggala antuk Kelihan Banjar utawi Kelihan Adat.
3. Tempekan kaenter antuk Kelihan Tempekan.
4. Prajuru desa adat / banjar, patut :
 - ha. mawit saking kerama ngarep utawi pangele ;
 - na. kaadegang prajuru melantaran antuk pamilihan jeroning paruman kerama desa / banjar, nyabran 5 (lima) warsa, sawawaning wenten pariindikan tios, tur sang sampun puputing panumaya, kengin kapilih malih ;
 - ca. maduluran atur piuning ring Pura Desa.

Pawos 11

1. Bendesa adat, karombo antuk ;
 - ha. Panyade, pinaka wakil bendesa adat.
 - na. Panyarikan, pinaka juru surat.
 - ca. Patengen, pinaka pangemong druwen desa
 - ra. Kasinoman, pinaka juru gumencang
2. Sajeroning ngenterang kasukertan kaniskala, bendesa adat, patut masinggihang pamangku kahyangan desa.

3. Prajuru desa taler ngadegang ulun desa utawi panglingsir, sane sinanggeh kerta desa, mawit saking prajuru sane sampun puputing panumaya, sang wikan ring adat miwah agama, kepala desa miwah sane lianan, sane kasulurang manut pararem.

Pawos 12

1. Swadharmaning Bendesa Adat, luire.
 - ha. Ngenterang paruman-paruman desa / banjar.
 - na. Ngenterang panglaksanaan sadaging awig-awig miwah pamutus-pamutus kerama desa / banjar, sane sinanggeh pararem.
 - ca. Ngraksa miwah nudonang tata titine migunayang sarajaberana druwen desa.
 - Ra. Nuntun saha ngenterang kerama desa rawuhing warga desa sami, ngupadi kasukertan sekala lan niskala.
 - ka. Nuntun saha nyaksi upacara sangaskaraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang warga desa nginggilang sang hyang agama, kasucian kahyangan, kasucian palemahan, kasucian pawongan miwah tata titine migunayang setra.
 - ta. Mawosin miwah niwakang pamutus marep ring wicaran warga desa.
 - sa. Ngwakilin desa / banjar, metemuang bebawos ring sapa sira ugi.
 - wa. Lan sane sowosan sane wenten pekilitiya ring desa / banjar.
2. Tata titine ngelaksanayang swadarma inucap ring ajeng, tan maren patut satinut ring daging awig-awig, pararem, dresta miwah pamutus paruman desa / banjar.
3. Panglaksanaan ring ajeng patut kasiarang ring desa / banjar kapungkuripun.
4. Sumakuta utawi sumanggup natak pemutus paruman desa / banjar, ngeninin swadharman sowang-sowang prajuru

Pawos 13

Patias utawi olih-olihan prajuru / dulun desa, luwire :

- ha. luput reramon utawi peson-peson ;
- na. luput paturunan marep ring kabuatan desa / banjar ;
- ca. polih tanding tengah ;
- ra. polih pah-pahan upon-upon pelaba carik / tegal druwen desa ;
- ka. patias sewosan manut pararem.

Pawos 14

1. Prajuru / dulun desa, kapilih nyabran 5 (lima) warsa, ngawit saking padewasane kaadegang prajuru / dulun desa.
2. Prajuru / dulun desa sane swadharmanya sampun puputing sengker kengin kapilih malih.
3. Pariindikane ngadegang prajuru / dulun desa sakaluwire kapastikayang malarapan paruman kerama desa tur kaingkupin antuk kerama.
4. Wusan dados prajuru / dulun desa, sangkaning :
 - ha. lina.
 - na. Pinunas ngraga malantaran jalaran sane pastika.
 - ca. Swadharmanya sampun puputing sengker.
 - ra. Kawusang / kanorayang olih kerama desa duaning iwang pamargi, menawi nilar sesana.

5. Ngentosin, ngwusanang utawi nganorayang prajuru / dulun desa, patut kamargiang sajeroning paruman kerama desa tur kaingkupin antuk kerama desa.

6

Palet 3

Indik Kukul.

Pawos 15

1. Dudonan kukul ring Desa Adat Beraban, luire.
ha. Kukul desa.
na. Kukul banjar.
ca. Kukul sekaa-sekaa.
2. Kukul desa / banjar, kamanggehang pinaka piranti utawi sarana tengeran maka wangsit ring wewengkon wewidangan desa / banjar.
3. Tetepakan suaran kukul manut dresta tur anggah unggah tetepakan ipun kaunggulan jeroning perarem.

Pawos 16

1. Kukul tan wenang katepak yan tan sangkaning pituduh prajuru, sajawaning tengaran kapancabayan.
2. Sang nepak kukul desa / banjar tan sangkaning piduduh prajuru patut digelis atur supeksa maka buatan penepake; yan piwal sang mamurug wenang katibakin danda, manut pararem.
3. Kukul sekaa-sekaa miwah kukul pondokan-pondokan tan kalugra nyawerin utawi sukat miwah tetepakan kukul desa / banjar; prade mamurug sang mamurug taler wenang katibakin danda, manut pararem.

Palet 4

Indik Paruman

Pawos 17

1. Dudonan paruman ring Desa Adat Beraban, luire.
ha. Paruman kerama desa, kawentenang sanistannya apisan sajeroning awarsa utawi manut kabuatan, sane karihinin antuk tetibak arah-arah.
na. Paruman Padgatakala, rehning wenten indik sane dahat mabuat sane pacang kabawosang, sane karihinin antuk tetibak arah-arah.
ca. Paruman kerama banjar, kawentenang kabuatan.
ra. Paruman prajuru / dulun desa, kawentenang manut kabuatan.
ka. Paruman sekaa-sekaa, kawentenang manut pararem.
2. Pamargin paruman kerama desa / banjar, patut nganutin dudonan :
ha. Paruman wahu kengin kakawitin sesampune katedunin antuk pinih kedik kalih pah tiga lintang saking patut ngamiletin, kamanggala antuk tengeran suara kukul, mabusana adat bali tan kalugra makta begawan sakaluire, karihinin antuk ngarcana Bhagawan Panyarikan majalaran widhi widhana lan cane.

- na. Maka pengawit kalaksanayang panyacak pangesepe karuntutin antuk nyacak dedosan wahu kalanturang antuk parum; sesampun parumane patut, patut kacacak malih tur sane kasep, sang ninggal paruman miwah sane nosa, wenang katibakin danda, sane ageng alitipun kasulurang manut pararem.
- ca. Maka pamastika wahu kengin nyacak pangesepe kasulurang manut pararem.
- ra. Sajeroning paruman tan kalugra ngwetuang wak ghora minakadi ngardi biota; sang mamurug wenang keni pamidanda bea pecamil sakadi dandaning anguman-uman ring paseban sane kasulurang manut pararem.
- ka. Pamutus bebawos sane briuk sapanggul utawi ingkup, punika sane kaaptiang tur kamanggehang.
3. Prade daging peparumane nenten kaingkupin, prajuru desa / banjar mangda ngilikang bebawos saha pamutusna mangda kararemin antuk kerama desa / banjar; bilih jantos ping tiga taler nenten praside kaingkupin prajuru desa / banjar dados nunas bawos ring kerta desa nganutin dudonan : kaingkupin paiguman prajuru, kaingkupin paiguman kerta desa pinih untat, malih katunasang pamutus sajeroning paruman kerama desa / banjar.

Pawos 18

1. Sajeroning paruman kerama desa, bendesa adat patut nyiarang pamargine ngenterang desa pamekas ngeninin indik.
- ha. Munjuk lungsuring gebogan pakraman saha ayah-ayahanyane, minakadi sulur arta berana druwen desa.
- na. Pangrencanan prajuru, ngeninin usahaan desane kapungkur.
2. Pamutus paruman kerama desa sane sinanggeh pararem, kamanggehan maka pamitegep panglaksanaan awig-awig.

Pawos 19

1. Paruman prajuru / dulun desa kawenangang wantah ngrincikang pangrencana marep ring usahaan desane kapungkur.
2. Paruman prajuru desa tan kawenangang ngamedalang teteganan ring kerama desa saderenge kaingkupin antuk kerama desa.
3. Pamutus paruman prajuru / dulun desa kengin ngwetuang pasuara manut daging pituduh sang ngawa rat utawi ngonekang pamutus sane pecak sampun dados pararem kerama desa.

Palet 5

Indik Druwen Desa

Pawos 20

1. Sane kamanggehang dados druwen Desa Adat Beraban, luire.
- ha. Kahyangan desa, luire.
- (1) Kahyangan Tiga : Pura Puseh, Pura Dalem.
- (2) Kahyangan druwen desa sewosan ring kahyangan tiga, minakadi : Pura Prajapati, Pura Pempatan Agung.
- na. Karang ayahan desa
- ca. Setra 90 Ha.
- ra. Niasa lan Sesanti.

- ka. Lembaga Perkreditan Rakyat (LPD)
- da. Lelangwan, minakadi tetabuhan lan ilen-ilen druwen desa, luire.
 - (1) Gong, Angklung, Pelawatan Ida Betara marupa rangda lan barong ring sowang-sowang banjar, sane sinanggeh druwen sowang-sowang banjar.
 - (2) Ilen-ilen wali ring pura juru kidung
 - (3) Lekita-lekita : awig-awig, pararem.

2. Olih-olihan Desa Adat Beraban mawit saking :
 - ha. Upon-upon pelaba pura
 - na. Paturunan saking kerama desa.
 - ca. Dana punia tiyosan sane patut.
 - ra. Upeti tanah ayahan desa
3. Sanangken paruman kerama desa, bendesa adat patut nyiarang munjuk lungsur upon-upon laba pura lan sapanunggalannya sane sinanggeh druwen desa.
4. Upon-upon pelaba pura lan sapanunggalannya kaanggen prabia piodalan miwah wewangunan ring pura taler prabia tiosan marep ring kabuatan desa adat.
5. Sakaluring druwen desa patut wenten likitannya sane pastika.
6. Tan kalugra ngadol utawi ngesahang druwen desa yan tan kacumponin antuk kerama desa sami.

Palet 6

Sukerta Pamitegep

Kaping 1

Karang, Tegal lan Carik

Pawos 21

1. Kerama desa sane ngamong karang desa utawi karang paumahan ngraga patut ngawatesin karangnya sowang-sowang antuk pagchan / turus utawi tembok mangda pakantenannya asri.
2. Watase sane mawasta gegaleng kaluan miwah gegaleng kateben mangda nganutin dresta tur kakaryanin olih sang negen wates inucap.
3. Prade karasayang pagchan / turus inucap nglikadin yan pada arsa panyandinge watase kengin nganggen pinget utawi prasihna pal saking Badan Pertanahan Nasional sakewanten kasaksi antuk prajuru desa / banjar.
4. Prade wenten karang kabebeng mangda kautsahayang wenten pamesuannya sane pastika.

Pawos 22

1. Sinalaih tunggil kerama desa / banjar, nenten kalugra :
 - ha. ngalah-alah margi, karang desa, tegal ayahan desa, tegal / carik kerama lian lan sakancan punika.
 - na. ngalah-alah tegak kahyangan, setra lan sekancan tegak sane sinanggeh suci.

2. Prade wenten mamurug kecape ring ajeng sang mamurug patut ngwaliang tanah inucap tur sang ngalah-alah tegak suci tiosan ring ngwaliang tanah tegak suci inucap taler patut karuntutin antuk dewa danda miwah artha danda sane kasuhurang manut pararem.

Kaping 2

Pepayonan

Pawos 23

1. Ngawit nandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sane jantos ngliwat wates, wenang kesepatgantungin.
2. Pepayonan sane ngungkulin mawastu mayanin kapisaga, sang nruwenang pepayonan inucap patut kawara tur kairing mapaiguman antuk sang rumasa katetehan, bilih-bilih sang nruwenang, arsa ngrebah utawi notor wit pepayonane punika.
3. Pradene sampun kawara taler tan wenten utsahan sang nruwenang, sang rumasa katetehan wenang masadok ring prajuru, tur risampune kaparitas kandugi wenten lelugrahan prajuru, wahu wit pepayonane punika kengin karebah, sakewenten panukun patin tur wit pepayonan sane karebah punika, kasukserahang ring sang nruwenang.
4. Sang patut keni pamidanda payangaskara saha prabea manut pararem, marep ring wewangunan sang karubuhan, luwire :
 ha. Sang nruwenang wit pepayonan sane sinanggeh mayanin, pradene pungkut tur ngrubuhin wewangunan krama tiosan ;
 na. Sang notor, monggol utawi ngrebah taru tur ngrubuhin wewangunan kerama tiosan.
5. Kerama desa patut ngamanggehang kawredian tanem tuwuh sane ngawinang desane asri tur lestari sane kawastanin Bhuta Hita sane matesges kelestarian lingkungan hidup.
6. Sinalih tunggil kerama sane pacang ngrebah pepayonan minakadi tanem tuwuh sane ngawinang desane asri tur lestari patut masadok ring prajuru.

Kaping 3

Wewangunan

Pawos 24

1. Nyabran ngwangun, sowang-sowang kerama patut :
 ha. masadok ring prajuru, pemekas marep ring wewangunan sane mapanyaitan minakadi menengin wates.
 na. Ngangge Asta Bhumi miwah gegulak Asta Kosali sanistannya manut ring patitise ka niskala.
2. Prade wewangunane jantos nyayubin ka pisaga, bilih-bilih temboke ring telenging wates, risampune kawara tur kairing mapaiguman taler tan wenten utsahan sang nruwenang, kangkat kasadokang ring prajuru; sesampune kaparitas tur wenten lelugrahan prajuru, sang nruwenang wenang keni danda manut pararem, tur tembok inucap patut kagubar olih sang nruwenang sanistannya mangda kakaryanang abangan.

Kaping 4

Wewalungan

Pawos 25

1. Sahanan warga desa sane miara wewalungan : bawi, banteng lan siosan punika mangda siaga nitenin negul minakadi glogor wewalungannya mangda nenten ngrusak karang utawi pabianan kerama tiosan, bilih-bilih jantos ngranjing ngletchin kahyangan.
2. Prade wenten wewalungan malumbar utawi ngeleb tur ngrusak karang utawi pabianan kerama sewosan, risampun kawara taler nenten wenten utsahan sang nruwenang, yan wewalungan punika malih ngrusak karang utawi pabianan kerama sewosan, wewalungan inucap kengin kataban tur sang nruwenang wenang katibakain danda ngwaling panukut wit tetanduran sane karusak saha nahur panebas pepiaran tetaban manut panglokikan prajuru desa / banjar.
3. Parde wenten wewalungan ngranjing jantos ngletchin genah suci minakadi kahyangan, pamrajan lan sekancan punika risampun kaparitas antuk prajuru, sang nruwenang wewalungan inucap wenang keni dewa danda lan artha danda, agung alitipun manut kecap sastra agama sane kapikukuh antuk kerama desa / banjar.
4. Kerama desa patut nyerayanin wewalungan miwah sarwa prani, tan kapatut mademang paksi, nuba ulam lan sakancan punika, pinaka sinalih tunggil utsahan kerama desa ngardi Bhuta Hita.
5. Sahanan warsa desa sane miara wewalungan mangda ngelestarian lingkungan soang-soang
6. Sang mamurug kecape ring ajeng wenang keni danda manut pararem.

Kaping 5

B h a y a

Pawos 26

1. Bacakan bhaya luire : jiwa bhaya, artha bhaya, agni bhaya, toya bhaya, lindu bhaya lan siosan punika ketahipun kawastanin panca bhaya.
2. Sinalih tunggil kerama desa sane manggihin prasihna pastika wentene sahanan panca bhaya patut digelis nepak kulkul tengeran kapanca bhayan tur digelis masadok ring prajuru.
3. Prade desane kahanan jiwa bhaya, kerama desane patut ngaturang upacara pamahayun desa manut kecap sastra agama sane kapikukuh antuk kerama, tur sang ngwetuang jiwa bhaya katur ring sang ngawewenang.

Pawos 27

1. Sinalih tunggil kerama sane manggihin prasihna pastika wentene arta bhaya (kamalingan) patut digelis nepak kulkul tengeran pamitulung manut pawos 15 (3) utawi pawos 16 (1); sang kamalingan patut atur supeksa ring prajuru; sang kacihnan ngamaling katur ring sang ngawewenang, maweweh malih patut keni dewa danda lan artha danda manut pararem, yan ipun ngamaling barang druwen desa sane sinaggeh suci.

2. Sowang-sowang kerama desa tan kapatut mapailonan ring dusta; sang kacihnan mapailonan ring dusta patut katibakin danda kadi dandaning maling, sane kasulurang manut pararem.
3. Indik ngrereh reramon minakadi daun kelapa, ron miwah sane sewosan ring pabianan kerama tiosan rikenjekan suwung, kasulurang manut pararem.
4. Indik ngranjingin pakubon utawi pakarangan kerama sewosan rikala suwung mawastu raris sang maderbe pakubon utawi pakarangan kaicalan, kasulurang manut pararem.
5. Indik ngranjingin pakubon utawi pakarangan kerama sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut pararem.

Kaping 6

Panyanggran Banjar

Pawos 28

1. Kerama banjar ring sawewengkon Desa Adat Beraban patut sareng nyanggra karya suka-duka sowang-sowang kerama banjar.
2. Tetibak panyanggrane inucap ring ajeng, kasulurang manut pararem.
3. Sowang-sowang kerama banjar sane pacang nangun karya suka-duka sane mabuat, mangda masadok ring prajuru.

CATURTHAS SARGAH

SUKERTAN TATA AGAMA

Palet 1

Indik Dewa Yajnya

Pawos 29

1. Kahyangan-kahyangan panyiwian Kerama Desa Beraban, luire.
 - ha. Kahyangan Tiga : Pura Desa / Baleagung, Pura Puseh, Pura Desa, Pura Dalem.
 - na. Kahyangan-kahyangan panyiwian kerama desa tiosan ring kahyangan Tiga : Pura Prajapati lan Pura Pempatan Agung.
2. Tegak piodalan ring sowang-sowang kahyangan inucap ring ajeng, kamanggehang sakadi ring sor punika :
 - ha. Pura Desa / Baleagung ring rahina Anggara Kasih ukun Perangbakat.
 - na. Pura Puseh ring rahina Anggara Kasih uku Perangbakat.
 - ca. Pura Dalem ring rahina Wraspati uku Dungulan.
 - ra. Pura Prajapati ring rahina Wraspati uku Dungulan.
 - ka. Pura Pempatan Agung ring rahina Wraspati ku Dungulan.
3. Pamargin pangacine ring sowang-sowang kahyangan inucap ring ajeng, manut kecap sastra agama, saha kelaksanayang kanista, madhyama, utama, manut kawentenan krama sane kaingkupin jeroning pararem.

1. Ring sowang-sowang pura inucap ring ajeng, patut kaadegang Pamangku.
2. Pidabdabe ngadegang Pamangku, nganutin dudonan ;
 ha. ngwilang saking turunan utawi ngwaris ;
 na. malantaran nyanjan utawi nuhur ring pura sane karerehang Pamangku ;
 ca. malantaran kapilih antuk Krama Desa.
3. Sang tan wenang kaadegang dados Pamangku, luwire :
 ha. cedangga, luwire : peceng, perot cungh lan sapununggilannya ;
 na. sapa sira ugi sane nenten kapatutang manut pararem ;
 ca. nandang sakit ila, ayan, buduh miwah pinungkan sane tan keneng tinamban ;
 ra. sang maderbe parilaksana nenten becik.
4. Prabea kapamangkuan :
 ha. prabea upakara/upacara adiksa widhi utawi ngwintenang Pamangku, kamedalin miwah kalaksanayang antuk krama desa ;
 na. marep ring prabea pitra yajnya ring pamangku, panyade, serati, sutri yan seda riwekas, krame desa patut maweh dana punia atiwa-atiwa, manut pararem.
5. Pamangku patut ngamanggehang sesana miwah agem-ageman pamangku.

Pawos 31

Swadarmaning pamangku, luire.

- ha. ngenterang upacara piodalan ring kahyangan sane kaempon utawi ring pakubon sowang-sowang kerama.
- na. Prade sinalih tunggu pamangku kahyangan desa kapialang utawi cuntaka, kengin nyelang pamangku kahyangan desa tiosan, utawi nuhu sang sulinggih, katitenin antuk prajuru.
- ca. Yan pamangku kalayusekaran wenang anglepas swadarma, kasulurang manut pararem.
- ra. Yan pamangku sampun tigang rahina ngayah ring puru sane kaempon, kancit wenten kulewargannya kalayusekaran, pamangku inucap tan keneng cuntaka, sakewanten nenten kengin budal selami piodalan.
- ka. Munggah tedun ring palinggih-palinggih kahyangan desa miwah ngiyasin pralingga, manut pamastikan prajuru.
- da. Ngrajegang sehanan pamangku.

Pawos 32

Patias utawi olih-olihan pamangku, luire.

- ha. panyolasan miwah sarin canang rikala muput yajnya ring sowang-sowang pakubon kerama.
- na. Upon-upon pelaba carik miwah tegal, manut pararem.
- ca. Luput pakaryan miwah reramon.
- ra. Polih apahtigan sarin canang rikala wenten aci ring kahyangan sane paempon.
- ka. Luput saluwiring prabea wewangunan ring kahyangan sane kaempon.

Pawos 33

1. Pamangku kagentosin, riantukan.
 ha. seda
 na. pinunas ngrage, menawi kageringan lan sapanunggilannya
2. Tata carane ngadegang miwah ngentosin pamangku, kasulurang manut pararem.

Indik kasukertan kahyangan, kadudonang sakadi ring sor puniki :

1. Sane nenten kahugra ngranjing ka pura, luire.
 - ha. Sang katiban cuntaka, minakadi sebel ngraga :
 - (1) sebel kandel ngrajaswala, salami dereng mabresih
 - (2) sebel antuk ngembasang putra, salami 42 rahina, pateh ring sang karuron.
 - (3) Sebel pangantenan, sadereng mabiakala utawi makala-kalan.
 - (4) Sebel riantukan kalayusekaran, jantos puputing sengker sane kaingkupin jeroning pararem.
 - na. Makta sehananing bebaktan sane sinanggeh ngletchin, manut kecap sastra agama.
 - ca. Sato agung minakadi wewalungan suku pat, sajawaning rikala mapepada.
 - ra. Anak alit sadereng mayusa tigang sasih.
 - ka. Mabusana sane tan manut kadi tatacaraning ngranjing kapura.
 - da. Sadereng polih wak-wakan utawi patuduh saking prajuru desa.
2. Tata busanane ngranjing ka pura, kasulurang manut pararem.
3. Pratingkahe tan wenang ring pura, luire.
 - ha. Masumpah utawi macora, sajawaning pituduh prajuru dea.
 - na. Ngamedalang wak purusya utawi wak cepala.
 - ca. Mabanyu, makoratan, masenengan, makolem dados asiki lanang wadon, sangsang busana.
 - ra. Ngias raga minakadi menahang wastra, menchang pusungan lan sakancan punika, sajawaning sang sulinggih miwah pinandita.
4. Sewosan ring pamangku tan kalugra munggah tedun ring palinggih-palinggih, sajawaning wit saking pituduh ring prajuru desa.
5. Sang mamurug kecape ring ajeng wenang keni dewa danda, manut pamutus pararem.

Pawos 35

1. Yan wenten jadma karawuhan ring pura boya saking nyanjan tur ngawinang keramane biapara, wenang keni dewa danda lan artha danda, sane kasulurang manut pararem.
2. Prade kahyangan desane kahanan durmanggala minakadi kapancabayan, pamangku patut digelis masadok ring prajuru.
3. Indik upakara / upacara pamahayun kadurmanggala kahyangan desa mapagamel kecap sastra agama, sane kasungkemin olih kerama desa.

Palet 2

Indik Resi Yajnya

Pawos 36

1. Sang pacang madeg sulinggih utawi maduijati patut masadok ring prajuru desa miwah Parisada Hindu Dharma Indonesia.
2. Prajuru desa patut ngawas lan nitenin tur wenang mialangin, prade kacihnan wenten indik sane tan manut kecap sastra agama, tur sareng nyaksi upakara / upacara paduijatannya, saha nglantur nyiarang jeroning pararem lerama desa tegap rawuhing wates kawenangannya muput karya.

3. Kerama desa patut madana punia sapadeg miwah ring panglepas Sang Sulinggih riwekas, katuntun antuk prajuru desa.
4. Sang sulinggih wenang polih leluputan ayahan miwah peson-peson.

Pawos 37

1. Sajeroning muput yajnya, sang sulinggih patut ngutamayang muput yajnya ring wewengkon Desa Adat Beraban, sesampune patut wahu muput yajnya ring wewengkon desa tiosan utawi ka dura desa.
2. Kerama desa sami patut sareng ngawas lan nitenin katuntun antuk prajuru, mangda sahanan yajnya sane kalaksanayang olih sowang-sowang kerama desa kapuput olih sulinggih utawi pinandita, manut kawenangannya sowang-sowang.

Palet 3

Indik Pitra Yajnya

Pawos 38

1. Desa Adat Beraban patut sareng nyanggira van wenten sinalih tunggil kerama desa nglaksanayang pitra yajnya.
2. Tatacara payanggrane inucap ring ajeng kasulurang manut pararem.
3. Dudonan pamargin pitra yajnya :
 - ha. Majalaran mendem utawi ngeseng, maka cihna makingsan ring prethiwi, makingsan ring geni pinaka dharana antos nuptupang prabea
 - na. Majalaran upacara pangabenan utawi palebon
 - ca. Riwusan ngaben, patut kalanturan malih antuk upacara memukur tur karuntutin malih antuk nglinggihang dewa pitara.

Pawos 39

1. Sinalih tunggil kerama sane kalayusekaran / atiwa-tiwa, mangda masadok ring prajuru.
2. Swadarmaning desa / banjar.
 - ha. Kelihan banjar / kelihan adat patut maritatas sang kaduhkitan, napike pacang kependem, makingsan ring geni utawi lantur kaabenang.
 - na. Prade kapendem, raris kawentenang panepak kulkul tenggeran kalayusekaran.
 - ca. Panyanggran kerama banjar salanturnya manut sakadi sane sampun kaunggahang jeroning pararem, jantos pependemane puput.
 - ra. Prade makingsan ring geni, panyanggran kerama banjar salanturnya manut kadi daging pararem, jantos pamargin upacarane puput.
 - ka. Prade kaabenang, panyanggran kerama banjar salanturnya manut kadi daging pararem, jantos pamargin upacarane puput.
3. Tan kalugra nginepan bangkang.
4. Desane maweh galah ring sang kalayusekaran sejeroning pitung rahina kengin atiwa-tiwa, sajawaning wenten kabuatan tios saking sang yajamana.
5. Larangan kapendeman miwah palebon ring wewengkon Desa Adat Beraban kaunggahang jeroning pararem.

6. Prade wenten kalayusekaran rikala piodalan ring kahyangan desa, kengin mendem tan masadok tur patut ngrereh galah mamargi rikala wengi. }

Pawos 40

1. Desa Adat Beraban ngamanggehang indik cuntaka, mapagamel ring Pamutus Hahasabha Parisada Hindu Dharma Indonesia.
2. Tatacarane nyulurang kacuntakan, mapagamel kecap sastra agama.
3. Sinalih tunggil kerama sane kahanan cuntaka, yan durung utas tan kalugra nyarubin genah suci druwen desa miwah druwen sowan-sowang krama.
4. Sang mamurug patut keni dewa danda, manut pararem.
5. Sengker utas cuntaka manut kawentenannya, kasulurang sakadi ring sor punki.
 - ha. Kalayusekaran, cuntakannya kaanutang ring drestan desa miwah sastra dresta.
 - na. Ngrajasewala, cuntakannya tigang rahina ngawit saking ngrajasewala, utawi salamining ngrajasewala.
 - ca. Ngembasang putra, abulan pitung rahina ngawit saking putrane embas ngantos katiwakin upakara / upacara tutug kambuhan.
 - ra. Karuron, cuntakannya abulan pitung rahina ngawit saking karuron, ngantos katiwakin tirta pamrayascita.
 - ka. Pawiwahan, cuntakannya ngantos sampun mabiakala.
 - da. Gamia-gemana, cuntakannya ngantos sampun kapalasang karuntutin antuk mrayascita sikian, desa adat miwah kahyangan desa.
 - ta. Salah timpal, cuntakannya kapuputang manut manut kecap sastra agama miwah dresta desa.
 - sa. Anak istri mobot malantaran logika sanggraha kandugi nenten katiwakin upakara/upacara pabiakawonan, cuntakannya ngantos katiwakin upakara / upacara pabiakawonan.
 - wa. Anak istri ngembasang putra malantaran logika sanggraha kandugi pecak nenten katiwakin upakara / upacara pabiakawonan miwah widhi widhana, cuntakannya ngantos wenten meras anake alit, karuntutin antuk upakara / upacara manut kecap sastra agama.
 - la. Sad Atatayi, cuntakannya ngantos sampun mrayascita sikian miwah ngesehin prawerti.
 - ma. Mamitra ngalang, cuntakannya ngantos katiwakin upakara / upacara pabiakawonan.
6. Cuntaka kalayusekaran / kapademan :
 - ha. Kapendem, cuntakannya :
 - (1) Kulawargannya sajeroning pakarangan manut dresta.
 - na. Kaabenang, cuntakannya :
 - (1) Cuntakan sang nyambut karya pitra yajnya, manut dresta sane kapikukuh antuk pararem.
7. Sang katiben cuntaka,luwire :
 - ha. Kalayusekaran, sane cuntaka :
 - (1) sang kalayusekaran ;
 - (2) kulawargannya ;
 - na. Ngrajaswala, sane cuntake : sang ngrajaswala.
 - ca. Ngembasang putra, sane cuntaka : sang mederbe putra, lanang wiadin istri utawi yayah renan sang wahu embas.
 - ra. Pawiwahan, sane cuntaka : sang mawiwaha, lanang wiadin istri.
 - ka. Karuron, sane cuntaka : sang karuron rawuhing lanangnyane.

- da. Gamia gamana, sane cuntaka :
 (1) sang nglaksanayang gamia gamana ;
 (2) desa adatnyane.
- ta. Salah timpal, sane cuntaka :
 (1) sang nglaksanayang salah timpal ;
 (2) desa adatnyane.
- sa. Anak istri mobot malantaran logika sanggraha kandugi nenten katiwakin upakara/upacara pabiakawonan miwah widhi widhana, sane cuntaka : anake istri sane mobot punika.
- wa. Anak istri mobot ngembasang putra melantaran logika sanggraha kandugi pecak nenten katiwakin upakara/upacara pabiakawonan miwah widhi widhana, sane cuntaka :
 (1) sang ngembasang putra ;
 (2) putrane sane kaembasang.
- la. Mamitra ngalang, sane cuntaka : sang nglaksanayang mamitra ngalang punika.
- ma. Sad atatayi, sane cuntaka : sang ngalaksanayang sad atatayi punika.
8. Sang tan keneng cuntaka, luwire :
 ha. Sang Sulinggih ;
 na. Pamangu Kahyangan Tiga rikala piodalan ring pura, risampune ngalang sasih utawi ngalang tengah, kacirenin antuk

Pawos 41

1. Pamargin atiwa-atiwa utawi pangabenan kalaksanayang mapagamel kecap sastra agama miwah dresta.
2. Peputusan pangabenan kasulurang manut pararem.
3. Pangingune ring kerama banjar, kasulurang manut pararem.

Palet 4

Indik Manusa Yajnya

Pawos 42

1. Kerama desa minakadi krama banjar patut sareng nyanggra miwah nitenin yan wenten sinalih tunggil krama nglaksanayang Manusa Yajnya sane mabuat.
2. Tatacara panyanggrane inucap ring ajeng kasulurang manut pararem.
3. Sang pacang nglaksanayang Manusa Yajnya sane mabuat, mangda masadok ring Prajuru.
4. Manusa Yajnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha ngantos kalayusekaran riwekas.
5. Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Indik Bhuta Yajnya

Pawos 43

1. Desa adat Beraban patut nyanggra pamargin Bhuta Yajnya, marep ring kabuatan Desa Adat Beraban.
2. Pidabdab pamargin Bhuta Yajnya inucap ring ajeng mapagamel ring kecap sastra agama kaanutang ring drestan Desa, sane kapikukuh antuk pararem.
3. Kerama desa minakadi krama banjar patut sareng nyanggra sinalih tunggil krama sane ngalaksanayang Bhuta Yajnya sane mabuat.
4. Sang pacang ngalaksanayang Bhuta Yajnya sane mabuat, mangda masadok ring Prajuru.

Pawos 44

1. Bhuta Yajnya marep ring kabuatan Desa Adat minakadi carun sasih miwah sane lianan, kasulurang manut pararem.
2. Indik pamargin palelastian utawi makiyis, kasulurang manut pararem.
3. Nangken warsa, rikalaning Tilem Sasih Kesanga patut kalaksanayang Tawur Kasanga, kalanturang antuk Pangrupukan, pinaka cihna nyangra pangrawuh Nawa Saka Warsa (Tahun Baru Saka) ring pananggal apisan Sasih Kadasa, sane kawastanin Nyepi.
4. Rikalaning Nyepi, sowang-sowang kerama desa patut ngamargiang Catur Brata Panyepian inggih punika :
 - ha. Amati Geni : tan kengin maapi-api.
 - na. Amati Karya : tan kengin nyambut karya.
 - ca. Amati Lelangwan : tan kengin maoneng onengan, ngwijilang suara ghora, nabuh gegambelan lan sakancannya.
 - ra. Amati Lelungan : tan kengin malelungan mrika-mrika.
5. Catur Brata Panyepian punika kamargiang saking semeng jantos benjangne ngedas rahina.
6. Mangda Pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda sane kasulurang manut pararem.
7. Benjangne ring pananggal ping kalih Sasih Kadasa, kawastanin Ngembak Geni, sowang-sowang krama patut saling ngaksamayang sane kawastanin Dharma Santi.

18

PANCAMAS SARGAH
SUKERTAN TATA PAWONGAN

Palet 1

Indik Pawiwahan

Pawos 45

1. Kerama desa minakadi krama banjar patut sareng nyanggra miwah nitenin sinalih tunggil krama sane nglaksanayang pawiwahan.
2. Pamargin pawiwahan, luwire :
ha. Malantaran pepadikan ;
na. Malantaran ngorod utawi marangkat (ngrangkat) ;
ca. Malantaran nyentana utawi nyentana nyeburin.
3. Indik pawiwahan, Desa Adat Beraban ngamanggehang Undang-undanug Nomor 1 Tahun 1974 miwah Peraturan Pemerintah Nomor 9 Tahun 1975, indik Pawiwahan.
4. Tatacara panglaksanannya, mapagamel ring kecap sastra agama kaanutan ring dresta desa , sane kapikukuh jeroning pararem.
5. Sinalih tunggil krama sane pacang ngalaksanayang pawiwahan mangda masadok ring prajuru.

Palet 2

Indik Nyapihan

Pawos 46

1. Prajuru desa minakadi prajuru banjar wenang sareng mawosin miwah nitenin yan wenten sinalih tunggil krama sane mapikarsa pacang palas marabi, gumanti nenten kadurusan dados nyapihan.
2. Yan krama inucap kukuh ring pikarsannya desa adat minakadi banjar adat nenten sumakuta ring pamarginnya.
3. Saderenge pastika polih pamutus saking sang ngawawenang minakadi sang rumawos (Pengadilan Negeri) krama inucap manggeh keni tetegenan krama, sakadi nguni.

Palet 3

Indik Sentana

Pawos 47

1. Prajuru desa minakadi prajuru banjar wenang sareng mawosin miwah nitenin yan wenten sinalih tunggil krama sane ngindikang sentana.
2. Indik sentana Desa Adat Beraban ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan desa sane kapikukuh antuk pararem.

3. Sang pacang ngarajegang sentana, mangda masadok ring prajuru.

Palet 4

Indik Warisan

Pawos 48

1. Prajuru desa minakadi prajuru banjar wenang sareng mawosin miwah nitenin yan wenten sinalih tunggil krama sane ngindikang warisan.
2. Indik warisan Desa Adat Beraban ngamanggchang uger-uger jagat minakadi kawicaksanan sang maraga Guru Wisesa, kaanutang ring drestan desa, sane kapikukuh antuk pararem.
3. Sang pacang ngarajegang warisan, mangda masadok ring Prajuru.

SAT SARGAH

WICARA LAN PAMIDANDA

Palet 1

Indik Wicara

Pawos 49

1. Sane wenang mawosin wicara ring wewengkon Desa Adat Beraban inggih punika prajuru desa maka miwah dulun desa sane kawastanin Kerta Desa.
2. Prade sang mawicara tan cumpu ring Pamutus Kerta Desa, kengin nunasang ring sang rumawos.
3. Sahanan wicara sane mawit saking kacorahan sakaluwire sane sinanggeh nungkasin daging awig-awig, pasuara miwah pararem Desa/Banjar, patut digelis kabawosin olih prajuru, nenten nyantos pasadok malih.
4. Sajaba wicara sakadi ring ajeng, patut nyantosin pasadok sang nunas bawos.
5. Panepase mangda pastika nyantenang iwang patut malarapan Tri Pramana, inggih punika : saksi, likita, bukti, tur panepase tan maren nepek ring Catur Dresta.

Palet 2

Indik Pamidanda

Pawos 50

1. Desa/banjare, wenang nibakang pamidanda ring warga Desa/banjar sane sisip.
2. Tetibak pamidanda inucap ring ajeng, kalaksanayang olih Prajuru.
3. Bacakan pamidanda, luwire :
 - ha. Ayahan panukun kasisipan ;
 - na. Artha danda saha panikelnya, miwah panikel paturunan ;
 - ca. Rerampegan ;

- ra. Kawusanang makrama tur pipil karang ayahannya kawaliang ;
- ka. Panyangaskara.
- 4. Pamidanda sane katiwakang, patut masor singgih manut kasisipan.
- 5. Jinah utawi arthabrana pamidanda, ngaranjing dados druwen Desa/banjar.

Pawos 51

1. Krama sane langkungan ring tigang paruman ngalantur nenten nahur patururnan miwah dedandan, wenang karampag.
2. Tetibak rerampagan, nganutin tatacara sakadi ring sor puniki :
 - ha. Kalaksanayang olih prajuru kasarengin antuk krama pinih akeh tigang diri maka saksi.
 - na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
 - ca. Prajuru patut miteketang mangda barang-barang sane karampag punika digelis katebus masenger awuku, tur ring kutus rahinane pacang kalelang utawi kaadol.
 - ra. Tan kengin ngrampag saluwiring barang sane patut inggilang manut kecap sastra agama, miwah mademang pangupajiwan sang karampag.

Pawos 52

1. Prade sang pacang karampag mialangin pamargin rerampagan inucap mawastu sampun tan nganutin linging awig-awig, krama inucap wenang kanorayang.
2. Yan krama inucap manggeh piwal yadiastun sajeroning makudang-kudang paruman sampun kawehin patinget sakewanten manggeh piwal, tan wenten pamargi sewos, sajawaning krama inucap kawusanang makrama desa / banjar, tur pipil karang ayahannya kawaliang ring desa adat.
3. Rerampagan inucap ring ajeng kabawos buntas, risampun sang keni rerampagan punika :
 - ha. Nunas geng rena sinampura ring ajeng krama desa/banjar, riantukan piwal ring pasubaya sane pecak sampun kararemin.
 - na. Nahur pangargan panguwak pasubaya sadaweg pacang karampag, kadulurin antuk prayascita.

SAPTAMAS SARGAH

NGUWAH-UWUHING AWIG-AWIG

Pawos 53

1. Nguwah-uwihin awig-awig desa punika, wantah kengin kalaksanayang antuk paruman kerama desa.
2. Pakarsane nguwah-uwihin punika mangda mawit saking pakarsan krama desa, yadiastun kamedalang antuk sinalih tunggil prajuru utawi sinarengan.

Pawos 54

1. Sakaluwiring indik sane sampun kamargiang sadereng awig-awig punika kasurat, mangda kaanutang ring sadaging awig-awig puniki.

- 21
2. Sakaluwir sane durung kasurat sajeroning awig-awig puniki, menawi kangkat kanggen mitegepin awig-awig puniki, pacang kasurat jeroning Pararem.

ASTAMAS SARGAH

SAMAPTA

Pawos 55

1. Awig-awig puniki kawastanin awig-awig Desa Adat Beraban.
2. Awig-awig puniki kamargiang ngawit kaingkupin utawi kararemin.



Pawos 57

1. Awig-awig puniki kararemin duk rahina Buda, Manis..... wuku Perangbakt pananggal / pangelong ping Dua Sasih..... Isaka warsa 1922..... tanggal 5 April 2000..... magenah ring Desa Adat Beraban
2. Awig-awig puniki kalinggatanganin antuk Bendesa Adat miwah olih sang ngawewenang manut kawenangannya sowang-sowang tur kapikukuh antuk Murdhaning Pamikukuh : Bupati Kdh Tk. II Tabanan.
3. Register Nomor :

Luwir sang nglingga tanganin



Kelihan Banjar Gerombong
I Nyoman Windera



LEPIHAN I
NYASA LAN SASANTI DESA ADAT BERABAN

SUKSMAN NYASA :

1. Sibeh bucu lima, mateses : Desa Adat Beraban mapikukuh antuk Pancasila, Dasar miwah Darsanan Jagat Republik Indonesia.
2. Swastika jroning padma asta dala, mateses : Kerama Desa Adat Beraban nyungkemin miwah nginggilang agama Hindu.
3. Padma Panca Dala, mateses : Kerama Desa Adat Beraban sajeroning nyungkemin miwah nginggilang agama Hindu mapagamel antuk Panca Sraddha.
4. Candi bentar, mateses : Kerama Desa Adat Beraban sajeroning nyungkemin miwah nginggilang agama Hindu, tan mari sraddha bakti majeng ring Ida Sang Hyang Widhi.
5. Pucak gunung kekalih, mateses : agama Hindu sane kasungkemin miwah kainggilang antuk kerama desa Adat Beraban, mederbe tatujon kekalih, inggih punika : Jagaddhita miwah Moksah.
6. Segara, mateses : Krama Desa Adat Beraban nyabran warsa ngamargiang palclastian ka segara, gumana nunas tirta amerta sanjiwani ring Ida Sang Hyang Baruna.
7. Ante sambung sinambung jantos nemu gelang, mateses : pakilit pasikian Krama Desa Adat Beraban, sane sagilik saguluk salunglung sabhayantaka, pinaka gelar pinih mabuat sajeroning ngwangun Desa Adat Beraban.
8. Sesanti : Jagaddhita Ananta Winangun, mateses : Kram Desa Adat Beraban tan mari ngwangun Jagaddhita, pinaka titi pangancan mikelingang Moksaka sekala lan niskala.

LEPIHAN II
PANITIA PENYURATAN

KETUA I	: I Nengah Sunata.
KETUA II	: I Ketut Suma.
SEKRETARIS I	: I Gde Wijana Arnawa.
SEKRETARIS II	: I Made Suarnata.
BENDAHARA I	: I Ketut Sutarja.
PEMBANTU	: I Gede Budiasa.
PEMBANTU	: I Made Suryantara.
ANGGOTA	: I Wayan Wantra.
ANGGOTA	: I Wayan Nada.
ANGGOTA	: I Nengah Surata.
ANGGOTA	: I Ketut Noya.
ANGGOTA	: I Wayan Sepur.
ANGGOTA	: I Ketut Rota.
ANGGOTA	: I Wayan Sudika.
ANGGOTA	: I Gusti Made Ludra.
ANGGOTA	: I Nyoman Remawa.